

## Žemaitēškas mēnīatiūras

Blezingelē, to monēs nemīļejē,  
Regiedama, kāp tau lēpdau lizdieli...  
Vākus periesi vēina.

\*\*\*

Unt Līksūdēs kalna  
Veiziejau i saulē,  
Ir patekiejē mienou.

\*\*\*

Nesudegiau mašīnuo,  
Kumet ana degē,  
Sopratau – eso žēids.

\*\*\*

Staigē mērē milijonieriuos,  
Obagā apsidžiaugē...  
Nabaštēks irgi bova žmuogos.

\*\*\*

Puoets žvaigždēs skaičioun,  
Pruotings – šūda minka,  
Vuo žemē sokas aplink sava aši.

\*\*\*

Beiškuodams meilēs,  
Pametiau buoba  
Ēr soradau merga.

\*\*\*

Je bėjē vėlka,  
Eik i pēivas...  
Vēlks nudvies iš bada.

\*\*\*

Unt kalna karklā siūbava,  
Pakalnie – rinkiejē balsava...  
Vuo Lietovelēs neblēka.

\*\*\*

Je būčiau gondros,  
Atneščiau vāka...  
Bet siedo plēks unt taka.

\*\*\*

Mīliečiau žmuonis,  
Je būčiau angels...  
Bet eso klišis...

\*\*\*

Teisības eīškau –  
Rondo pelkē...  
Ēr eso kontēns...

\*\*\*

Saulē – žvaigždie.  
Žemē – planeta...  
Vuo aš asēls Žemie.

\*\*\*

Paskutinis nuors  
Priš smerti –  
Už vakar dēnuos nusitvertē...

\*\*\*

Je mīliesi muni,  
Aš tavēs nemošio...  
Žemie bus išsvajuota taika.

\*\*\*

Patīliek, je aš rokoujous,  
Saulē nusileis...  
Ir liksi pruotingiesnis ož muni.

\*\*\*

Je daug luosi –  
Lēižuvis nuskars...  
Ir nieka duora nepasakīsi...

\*\*\*

Ejau per pēiva,  
Spīriau i žēida –  
Vuo bētēs mon nespīrē.

\*\*\*

Palei gelžkeli  
Leiduos saulē...  
Leisdamuos monēs nematē.

\*\*\*

Vaikis garsē šaukuojē.  
Buočē tīlē tīliejē.  
Biega laiks kāp pašielēs.

\*\*\*

Saulē tekont  
Kartās gīvenēms bēngas...  
Bet tas ir netesībē.

\*\*\*

Lingavau vuoratinklie,  
Kol papūtē vies vakarū,  
Pabiegau... Supratau, kas īr laisvė.

\*\*\*

Pėrmuoji mergelė  
Parklopdė muni unt leda...  
Ēr pabiega... Tebkriuoko ė šėndėin.

\*\*\*

Kol prasėžiujau  
Tartė meili žuodi –  
Uns nusprūda šalėp lėižovė...

\*\*\*

Veiziejaus ėlgā  
I saulielīdi –  
Supratau – šėndėin nemėrsio.

\*\*\*

Je galiečiau,  
Omžėnā tiliečiau,  
Bet negalio.

\*\*\*

Apoulės pėliakalnie  
Artistā draskuos,  
Vuo aš netėko...

\*\*\*

Bova do muokītojė...  
Vėins griežts ėr teisings,  
Ontros – gers ė ne pėkts.

\*\*\*

Je galiečiau,  
Galva padiečiau,  
Tik nežėnau, ož kou.

\*\*\*

Kāp rėk numėrtė.  
Je nieks neskaud...  
Ēr teisībės vėsuos nepasakė?

\*\*\*

Senatvie – kumet sėmi  
Jaunīstė ėš šolėnės bedognės –  
Baisė saldė būn unt šėrdėis.

\*\*\*

Trumpā šnekiedams,  
Nieka nepasakiau,  
Bet muni ēšgērdot...

\*\*\*

Aš – sienis.  
Bet dūšiuo jauns.  
Tuo vēskas pasakīta.

\*\*\*

Aš jauns,  
Bet ne mulkis...  
Tuo vēskas pasakīta.

\*\*\*

Je kundi i širdi žmuogou,  
Žmuogos kond atgal...  
Ramībēs ir teisībēs nebier.

\*\*\*

Nekriuok, je vies pot  
Ne ēš tuos posēs...  
Rītuo papūs, kāp tau rēk.

\*\*\*

Lūšēs – žvierielis nekalts,  
Bet baisē laisvė mīl...  
Diel tuo ir nīkst pu biški.

\*\*\*

No ē kas, kad eso dolkē?  
Paukštiu Takē neso mulkis...  
Rītuo sosētēksiau omžēnībie.

\*\*\*

Je tau sunkē žemē ruopuotē,  
Atmink, kad lēki par Vēsatas vēduri.,  
Turietom dūšie palēngvietē...

\*\*\*

Mačerniaus vizējēs –  
Mums ēšganīms,  
Je mondros – pamatīk...

\*\*\*

Kāp būtom gražē,  
Je vēsē tīlietomem...  
Ēr vēins kēta ramē girdietomem...